

1349

槧溪居士集

膳錄貢生臣郭墉

欽定四庫全書

樵溪居士集卷五

宋 劉才邵 撰

制

易致堯循右文林郎制

案宋史食貨志紹興六年張浚奏改江淮屯田

為營田置營田司後李家玉弗等言營田之害浚亦覺其不便請罷司以監司兼之致堯仕履無考制云營田之設以豐軍儲爾壑闢居多當為提舉營田者附識以備考

勅營田之設以豐軍儲推而行之貴在得人爾壑闢居多當為提舉營田者附識以備考
多勤于宣力進階示賞用旌爾勞可

李衍循左文林郎制

勅爾頃緣營造勤於董役有司第賞宜膺敘進體茲示
勸益勉事功可

宋許循右文林郎制

案宋史選舉志紹興十年以南渡後人材萃於兩浙

而屬吏薦員甚狹增部使者薦舉改官之額二十二年右諫議大夫林大鼎言國初常叅官皆得舉人不限內外亦無員數南渡之初恩或汎濫有從軍而改秩者有捕盜而改秩者有以登對而改秩者請立考第增減之法又建炎初詔河北招撫河東經略及安撫等使皆得辟置將佐官屬行在五軍并御營司將領亦辟大小使臣於是諸司誘人填缺皆先領職而後奏給付

身有罪籍未敘復守選者乃令釐正使歸部依
格注擬自宋許以下八制似皆釐正後實際各
官者故制詞均有捕盜有賞捕寇有勞及便宜
補官一時之權銓曹叅覆乃加真授等語而劉
永叔林貳二制兼有記功使過改過自新之語
此正所謂罪籍未敘復守選者也附識於此

勅獲盜有賞所以報功輕重之差存諸格法今茲殄寇
爾預有勞進秩疏恩蓋以示勸往思報稱可不勉哉可

邱幹循右文林郎制

勅凡因討捕有所興發按名給餉理實相資爾能宣勤
用以不乏肆加敘進往服茂恩可

劉永叔復秉義郎制

勅朕待下以寬記功使過况嘗竭節其肯忘之茲用敘復官聯仍俾自效恩既厚矣圖報之志爾其勉哉可

荀沂補保義郎制

勅便宜補官蓋一時之權必考實於銓曹乃加真授所以慎名器也爾既經裁審肆錫贊書祇服恩榮益圖報稱可

林貳補保義郎制

勅明於禍福捕獲凶酋躡授官資用彰信賞且以為改過自新者之勸益圖後效以稱慈恩可

閻達轉保義郎制

勅國家設為軍賞以獎戰多輕重視功用伸激勸爾奮身巡徼捕寇有勞宜進厥官是為褒典往其祗服毋怠宣勤可

趙伯鎮換授承信郎制

勅便宜黜陟蓋一時之權銓曹叅覆乃加真授而先次

換給所以示優其承殊恩益思自勉可

吳宗謹授承信郎制

勅爾頃在殊方備嘗艱阻嘉其忠恪何惜一官祇服恩榮益思自勵可

李文會除御史中丞制

案李文會宋史無傳考宋史全文續通鑑紹興

十三年九月侍御史李文會奏洪皓貪戀顯秩不求省母又十四年三月御史中丞李文會奏解潛本趙鼎客不附和議五月御史中丞兼侍讀李文會言高閔王師心吳秉信久在朝列必害至治三人皆斥外即拜文會簽書樞密院事兼權叅知政事蓋文會乃秦檜姦黨以搃擊善

類而得顯秩者其除御史中丞當在十三年之末或即在逐洪皓之後歟附識於此

勅號獨坐而設專席既同乎漢室之官儀歷三院而為中司必得如溫造之威望嘗肅持於邦憲宜進總於臺綱具官某德履端良風猷凝遠挺正固不回之操據剛方自竭之忠勁氣霜嚴英姿鷄立自登言路茂著直聲蔽自朕心嘉乃成績茲擢從於橫榻俾陞冠於南臺朕方虛懷容納謹論汝其悉力糾劾官邪顧已試而克堪亦奚煩於多訓可

陳揆等除大府寺等丞制

案制云大府之屬大農之屬大匠之屬蓋

大府寺丞司農寺丞將作監丞也宋史職官志大府寺掌供祠祭香幣帨巾及校造斗升衡尺司農寺掌倉儲委積之政令總苑囿庫務之事將作監掌宮室城郭橋梁舟車營繕之事舊制有判寺事判監事有寺少監少有丞有簿其後官屬省置不一建炎二年二寺一監並罷紹興三年並復置丞又諸寺監丞有出身轉著作郎無出身轉大理寺丞故制云皆異時郎選也

勅具官陳揆等丞於寺監皆異時郎選也必惟其人迺副遴柬以爾揆才智敏明宜隸大府之屬以爾貺宜隸大農之屬以爾樵宜隸大匠之屬其佐爾長往服厥官

可

文浩除國子監丞制

案文浩事蹟不詳制云崇觀間嘗游上庠蓋以上舍

而游歷監丞者宋史全文續通鑑紹興十五年八月國子監丞文浩面對乞自今試教授於六經中取二經各出兩題不拘義式以貫穿該義為合格詔禮部看詳行之當即新除監丞時獲對者與

勅朕祇適先猷教養多士惟國子監實總內外之學政
丞於其間蓋以才選以爾當崇觀間嘗游上庠行藝之
美見稱多士茲用命爾往佐爾長其悉乃心以稱朕命

可

樓炤除資政殿學士知建康府制

案宋史列傳炤以紹興九

年除端明殿學士簽書樞密院事命往陝西宣諭德意還朝乞歸省親十四年以資政殿學士知紹興府過闕入見除簽書樞密院事權參知政事宋史全文續通鑑所載亦同未聞知建康府也十四年以前炤未嘗出知外郡並未為端明殿學士之除十四年以後炤參知未久尋為李文會等所劾除宣州徙廣州而卒亦未再知他郡觀制詞有易鎮名藩之語當是初除紹興旋改建康中間由紹興赴建康故有過闕入見之事也附考於此

勅朕惟建康宅江山之奧區為東南之都會總列郡兵

民之計有留司管鑰之嚴肆求舊弼之賢以重殿邦之
任具官某器資閎達德操端方奧學貫於天人達識周
乎事物蚤據遠業備歷華塗參贊樞庭既深裨於密畫
蕃宣侯屏益藹著於休聲備昭偉績之加益見壯猷之
效茲疇宿望易鎮名藩方資共理之良佇觀報政之速
顧惟近輔豈俟訓言可

王喚充寶文閣學士知平江府制

案宋史全文續通鑑紹興

十年二月王次翁希秦檜旨欲為知太平州秦梓知泰州王喚二人地因請悉罷不附和議者

二人皆以恩倖得官繇是驟進制詞有持節牧民又有頃貳冬官及抗章引疾之語當是由秦州擢工部侍郎旋乞外郡故以寶文閣學士知平江府也附考於此

勅姑蘇地重密邇行朝正資師帥之良往殿股肱之郡具官某材猷通敏識慮優長持節牧民具著成績輦轂之下政譽尤高頃進貳於冬官方有資於獻納抗章引疾至於再三勉推從欲之仁俾任分符之寄仍申加於殊眷進列職於西清報稱可期告猷勿怠可

吏部尚書羅汝楫兼侍讀制

案宋史職官志自慶厯以來臺丞多

兼侍讀臺長未有兼者羅汝楫以諫議始兼侍
讀自是每除言路必兼經筵而以尚書兼侍讀
則志無其文汝楫本傳未載其兼侍讀乃制特
書吏部尚書兼侍讀是史志誤也然制詞未敘
及見為何官或兼侍讀時本係諫議大夫而後
人編才邵集誤以所終歷之官冠之亦未可知
謹識以
備考

勅堯舜五帝之盛其所以成難名之功致無為之治載
於二典首以若稽古為言蓋人君監于成憲不折衷於
古訓將何所考哉仰惟前代留心載籍詳延通儒置之
經幄式資獻納以副簡求具官羅汝楫智識通明濟以

強敏淵源之學洞貫古今頃勸講於邇英既深嘉於博
洽宜登文石之陞進讀金華之書勿怠欽承以副虛佇
可

韓仲通除大理寺正制

案宋史職官志大理寺丞有出身轉殿中丞無

出身轉太子中舍或太子中允制云頃丞寺事既以能稱茲用褒遷式昭茂渥則是以寺丞而遷寺正者想南渡以後敘遷之法史亦不能盡詳耶附識於此

勅漢循秦制廷尉置正監平謂之三官則大理有正其
來遠矣非夫端良平恕之士其何以稱是名哉以爾仲